

湖南通志

湖南通志卷五十五

食貨志一 積儲

順治十二年題準各衙門自理贖緩春夏積銀秋冬積穀悉入
常平倉備賑置簿登報布政司彙報督撫歲底造報戶部如有
假公濫私隱匿漏報者督撫查參其鄉紳富民樂輸者地方官
多方鼓勵勿勒定數勿使胥吏侵剋及加耗滋弊 十三年議
準積穀振濟務令修葺倉廩印烙倉斛選擇倉書糴糶平價不
許別項動支 十七年議準常平穀春夏出糶秋冬糴還平價
生息務期便民如遇凶荒卽案數給散災戶貧民飭有司實力
奉行

康熙十八年題準地方官整理常平倉每歲秋收勸諭官紳士民捐輸米穀照例議敘鄉邨立社倉鎮店立義倉捐輸積儲公舉本鄉敦重善良之人管理出陳入新春月借貸秋冬償還每石取息一斗歲底州縣將數目呈詳上司報部管倉人儲穀多者題明給頂戴榮身有官吏掊克者照侵欺錢糧例處分有強派抑勒借端擾民者該督撫題參治罪 十九年覆準直省常平倉穀畱本城備振義社倉穀畱本邨備振永停協解外郡三十年議準各省常平倉照直隸分儲各州縣有陞遷事故離任者照交代收受正項錢糧例取具印結有短少者該督撫題參照虧空正項錢糧議處 三十四年議準令直省各督撫飭

各州縣衛所官員勸諭鄉紳士民人等每歲收穫各戶量力所
能不論幾石幾斗捐輸積儲若將米麥貸於乏穀之人俟收穫
時卽照原領米麥之數交納如有不肖官員抑勒多收情弊事
發卽照私派錢糧處分每歲收穫時卽俱照此遵行 三十六
年覆準湖廣三十五年分各官捐輸穀石存各屬倉廩備賑
四十一年議準設立社倉於本鄉捐出卽儲本鄉令本鄉誠實
之人經管上歲加謹收儲中歲糶借易新下歲量口發賑 四
十三年議準各省府州縣積儲米穀大州縣存一萬石中州縣
八千石小州縣六千石餘案時價易銀解存藩庫其存倉穀石
每年以三分之一出陳易新 四十六年覆準州縣虧空倉穀

知府隱匿分賠賠完府縣一體復職 四十七年議準州縣官於額儲積穀之外買穀儲倉照盤查贏餘之例準其議敘或州縣官捐穀本管倉內捐少報多或將現儲之米擅作捐輸以邀議敘後本官任內復有虧空事發除知府照例分賠外原報贏餘之督撫一竝議處 又議準職官將倉穀私借與民合依監臨主守將官錢糧私借與人者計贓以監守自盜論係雜犯準徒五年律不準折贖所少穀石仍著落本官追賠 四十九年議準霉爛倉糧官員已經陞任應革職畱於新任限一年賠完之日開復 又議準湖南鎮筸地方僻處苗疆改協爲鎮移駐道廳兵民日增歲歉恐食不敷撥司庫銀三千兩買穀備儲

五十四年議準直省社倉勸諭之例富民能捐穀五石者免本身一年雜派差役有捐一倍二倍者照數案年遞免至紳衿若能捐穀四十石令州縣給扁捐穀六十石令知府給扁捐穀八十石令本管道給扁捐穀二百石者督撫給扁其富民好義比紳衿多捐二十石者亦照紳衿例次第給扁捐至二百五十石者咨明吏部給與義民頂戴照未入流品服榮身凡給扁民家永免差役 六十年議準各省州縣現在存倉米麥穀石令該督撫嚴查如有虧空者勒限補足務期實儲以備賑濟儻有賑濟之時其存倉穀石虧空事發將地方有司官員卽行革職治罪暨不行稽查之上司一并嚴加議處

雍正元年議準常平倉積儲米穀雖有知府司道盤查管理不能保其一無徇私當責之督撫核實嚴查造冊具奏督撫陞轉離任將冊籍交代新督撫限三箇月查奏如有虧空卽行題參新任督撫不行據實參出後經發覺一并照例議處仍令分賠二年覆準社倉之法原以勸善興仁該地方官務須開誠勸諭不得苛派以滋煩擾至收儲米石先於公所寺院收存俟息米已多成造倉廩收儲設立簿冊逐一登明其所捐之數不拘升斗積少成多若有奉公樂善捐至十石以上給以花紅三十石以上獎以扁額五十石以上遞加獎勵其有好善不倦年久數多捐至三四百石者該督撫奏給八品頂戴每社設立正副

社長擇端方立品家道殷實者二人果能出納有法鄉里推服
令案年給獎如果十年無過該督撫題請給以八品頂戴徇縱
者卽行革懲侵蝕者案律治罪其收息之多寡每石收息二斗
小歉減息一斗大歉全免其息祇收本穀至十年息已二倍於
本祇以加一行息其出入之斗斛照部頒斗斛公平較量社長
預於四月上旬申報地方官依例給貸定日支散十月上旬申
報依例受納兩平較量不得抑勒多收臨放時願借者先報社
長州縣計口給發交納時社長先行示期依限完納其冊籍之
登記一社設立用印官簿一樣二本一本社長收執一本繳州
縣存查登記數目毋得互異其存縣一本夏則五月申繳至秋

領出冬則十月申繳至來春領出不許遲延以滋弊竇每次事畢後該地方官各將總數申報上司如有地方官抑勒那借強行糶賣侵蝕等事許社長呈告上司據實題參 三年議定湖南湖北四川江西四省存倉米石皆在五萬石內外令一年內改換稻穀飭各地方官添造倉廩以備收儲 又議準州縣倉糧凡遇出陳易新之時令佐貳官公同收放如州縣私自糶賣佐貳不據實通報扶同隱匿一幷議處 又覆準社倉預造排門冊將姓名年貌住址以及官紳士庶商賈逐一註明送官用印存案日後借貸悉以此爲準游手好閒者不許借貸於正副倉長外再公舉一身家殷實者總司其事令其不時查察如有

欺隱令其賠償果能使倉儲充牣題請準給恩典以示鼓勵此
項積儲如有官員抑勒那借許社長呈告上司據實題參其所
需一切紙張筆墨以及人工飯食或行勸諭或撥罰項以充其
用不得濫行科歛致滋擾累至積米既多於夏秋之交平糶秋
成照時價採買還倉 又覆準州縣虧空倉穀令接任官於秋
成穀賤之時申覆督撫藩司酌動錢糧照時價先行買補該州
縣出具倉收該管道府加具印結一面報部一面於虧空人員
名下勒限一年將動用銀兩照數追補如逾限不完照侵那倉
穀定例治罪仍著將本人家產變易還項 又覆準江安閩浙
湖廣江西四川兩廣雲貴十省所存米石俟收穀既完之後每

年額徵應給兵糧仍收米石餘悉改徵稻穀各省均照此例其有虧空倉米者亦令悉以稻穀追補還項凡有需用挨年先碾舊穀支給儻需用米多一時礱碾不及應給米一石者給穀二石 四年議準嗣後各省常平倉每年春間借出穀石秋收後勒限徵比務於十月底照數完納造具冊收送部歲底令知府直隸知州親往盤查其府州倉穀責令該管道員盤查出具印結申報如逾限不完或捏造冊收卽行揭參議處在該員名下照數追賠仍令欠戶照數完納如係頑紳劣衿奸牙積蠹將佃戶家人姓名影射每名借穀四五斗零星領出入已積至二三十石者其紳衿卽行黜革所欠穀石亦令加倍追還枷責治罪

其代爲造冊之鄉保地方嚴審有無受贓分別治罪如該管上司不行揭參照徇庇例議處再倉穀出糶之時不無奸商勢豪串通牙蠹捏名影射零星糶出囤積射利地方官若不嚴行查禁該督撫卽行指名題參照溺職例議處或有不肖州縣以糶借爲名掩飾虧空該督撫卽行指名揭參嚴審是侵是那分別治罪該管道府直隸知州有不時盤查之責如有徇庇隱匿卽題參照例議處將所虧倉穀著落分賠如道府直隸知州已經揭報而督撫不行題參者將督撫亦照徇庇例議處所虧倉穀亦照例分賠 又議準湖廣鹽商捐買穀銀一萬兩令湖北分買穀價銀六萬兩湖南分買穀價銀四萬兩分發各府飭令

就近採買存儲

乾隆十三年議準直省常平倉儲康熙年間或未經定額或定額無多檔冊不全難以稽考請照雍正年間作爲定額內惟雲南甘肅二省地處極邊兼備軍糈雍正年間倉儲多寡無定應以乾隆年間所定之額爲準令各省督撫按所屬大小均勻存儲其間有轉運之難易出產之多寡地方之緊要以及提鎮駐劄處所并各省犬牙相錯之處彼此可以協濟者均應分別加儲定額後各該督撫據現存并出借平糶應買各數目較之現定之額通盤核算如溢額卽將溢額穀石及出借徵還餘賸穀石以次出糶報部其現在溢額糶價提儲司庫報部酌撥或額

內出借穀石一時不能催交齊全而該處豐收價平卽於此項糶價銀內奏明酌畱買補再額內不足省分實在穀石溢額之處無多均應以收捐本色漸次補足至於存糶之法定例存七糶三然風土有燥溼年歲有豐歉價值有貴賤地方有衝僻各省情形不同辦理亦量爲增減其每年平糶之穀例於秋後原價買補然價平則買價貴則停總在地方大吏因時因地妥酌奏辦使倉儲有充裕而閭閻無食貴之虞再收捐監穀原所以實倉儲而備荒歉各省現在俊秀報捐在外收捐本色在內收捐折色除不敷定額省分仍以收捐補足外其額外有餘各省所收本色應令另案存儲遇有賑卹卽於此內撥用或平糶穀

石不能買補卽將此項穀石撥抵所存糶價造報酌撥是動用
可無需採買而緩急仍不患無資於民食儲備兩有裨益計湖
南省照雍正年間定額儲穀七十萬二千一百三十三石零現
在實存穀一百二十五萬六千四百一十四石零共溢額穀五
十五萬四千二百八十一石零又借穀五萬九千三百六石零
出糶穀二十一萬八千六百八十石零存價銀一十一萬八千
九百二十五兩將現存糶價提解司庫造報酌撥溢額穀石并
出借催還穀石以次出糶報部 又覆準於溢額穀內撥出三
十萬石以備鄰省告糶之用酌撥後無庸買補 二十年巡撫
陳宏謀奏準湖南常平額穀厯年止供平糶原不出借四鄉農

民專望借領社穀接濟春耕計通省社穀已積有四十三萬二千餘石每州縣多者在一二萬石以上其餘自數千石以至數百石不等去冬因江浙搬運過多米糧日漸昂貴誠恐入春更甚一面委員分查積欠乘其秋收未久及早催追一面出示曉諭一屆春耕先將社穀儘數出借另定規條刊刻分布俾官紳士民均知社穀之易於借還年年可以接濟寫遠者爲之分社令其就近借還隨勸諭陸續捐輸湖南產米之鄉第能經理得人借還有法息又生息湖南社穀不患不日加充裕也惟是社穀太少之處不敷出借今擬於止有社穀一二三百石之乾州永綏二廳華容永定二縣借撥常平倉穀八百石止有五六七

百石之永順保靖桑植慈利四縣借撥常平倉穀五百石各於本處倉內撥作社本同現有社穀一體出借接濟民食計共撥常平倉穀五千三百石年年生息數年之後社本漸充仍卽歸還常平不致虧缺於接濟更爲得力仍每年於奏銷冊內登明報部查核 四十六年巡撫劉墉奏準各省社倉積儲協濟常平例於秋成收穫之後勸諭捐輸春借秋還收息歸倉歷來遵行在案查湖南社倉本息共存五十九萬一千一百餘石自乾隆二十二年以後未經增捐去歲湖南通省豐收而下游浙江地方亦俱豐稔穀價不昂當與司道各官公同籌畫先令長沙善化瀏陽醴陵湘潭益陽甯鄉湘鄉攸縣茶陵衡陽清泉衡山